



Fasnecht 2024



Dr verhäxti Platz

Das alles, was mir sit Joore immer wieder ghöre
duet eus wahnsinnig verunsichere und au störe
dä Platz zwüsche Törli und Bahndamm, wo s'sit viele Joor git
söll e neue Name bescho, do mache mir aber sicher nit mit
d'Präss, die duet wie immer in grosse Lettere brichte
vo Ammemärli und gruslige Geschichte
in dä füziger Joor, do het me wäg em Verchehr dört obe
alli Hüüser abgrisse und e Stross dört dure gschobe
so isch dr Wasserturmplatz entstande an dere Stell
es git viel Platz und alles isch offe und hell
Karussell stönde uf em Platz und Parkplätz duet's geh
und hinde am Platz het dr Guggeheim Platz für si Veh
Alli chönne's gniesse und hei e grossi Freud, s'isch toll
dr'Name isch au klar und das isch wundervoll

Doch denn goht dä ganzi Häxetanz los, es macht eus betroffe
mir verstönde das nit, mir hei s'Gfühel, mir si grad bsoffe
dr Felix, da vom Mühlise obe, dä duet ufbegähre
und d'Öffentlichkeit immer wieder mit neue Vote ernähre
er meint, dä Platz do obe am Törli vor sim Kaffi, dä muess
anderscht heisse, so schriebe er uf ere Tafele mit eme Gruess
Törliplatz muess dä Platz jetz heisse, das isch eso
nur so cha er wieder schloofe und zur Rueh denn cho
er weiblet vo Amt zu Amt in dr Stadt und im Kanton
für Vieli isch das nur Spott und au no Hohn
fascht jedi Wuche, do duet er in blühende Wort brichte
er umrahmt das Alphornklang und rührende Gschichte
nit lugg loh, so heisst si Motto und so
isch s' denn cho, wie's het müesse cho

Si Kaffi, das duet er immer wieder erwittere
vorusse cha me hocke, bi Sunneschiin oder ob's duet Gwittere
e paar Bäumlü sperre dä Platz ab und vom Verchehr trenne
als Fuessgänger muesch pressiere und über die Stross denn renne
uff dr andere Syte, do duet me e neu Bushaltestell anestelle
und e Kiosk duet jedem s'Gmüet zusätzlich erhelle
die Bushaltestell, die duet me denn au wie dr Platz benenne
als Wasserturmplatz duet me sie immer erkenne
d'Lüt, die si froh, dass si chöne vom Stedtl grad uf e Bus
und erscht no im Schärme stoh, für vieli isch das e Gnuss
doch denn dien schwarzi Wolke uffzieh, denne
me will e neue Name für die Haltestell, will sie umbenenne

D'BLT, die duet sich lo verneh mit grosse Wort
und ladet im Dezämber alli i an dä verhäxti Ort
me will fiire und sich uf d'Schultere chlopfe
und sich zueproschte mit Wii oder au mit Hopfe
drzue duet dr Spinnler Dani, euse Stapi
mit grosse Wort verkünde, was goht, dä Lappi
die Haltstell wird jetz umtauft und neu benennt
nüm so, wie si jedes Chind scho kennt
Törli duet sie jetz heisse, was mir nit begriffe
mir bhalte dr alti Name und dien druff piffe
au s'Volk cha das nit verstoh, es duet nur no schmunzle
und mir bechöme vo so viel Dummheit neu Runzle

Mir Häxe dien eus drum nüm länger verschanze
und mit eusem Häxebäse dört obe umetanze
mir näme da Platz i und si gar nit dumm
und taufe ihn churz und knapp in Häxeplatz um
verhäxt isch die Sach jo scho sit Joore
egal ob's schön isch, oder me het gfroore
anstatt sich uff's Wichtige z'besinne
duet me ufbegehre und fascht afoh spinne
für eus isch das alles eifach nur e grosse Seich
mir chöne nur no säge, das isch biireweich
jetz aber gnueg brichtet und gläschteret, ab uff'd Gass
als Häxe umezieh, so macht eus d'Fasnacht eifach Spass
und ab und zue, do ziehn mir sicher au
über euse Häxeplatz mit unserer Fasnachtsschau